

四庫全書

史部

欽定四庫全書

欽定續通志卷三百十一

列傳

宋十五

顏衍

劇可久

趙逢

蘇曉

高防

馮瓚

邊珣

王明

許仲宣

楊克讓

段思恭

侯陟

李符

魏丕

董樞

顏衍字祖德兗州曲阜人自言充國公四十五世孫少苦學治左氏春秋梁龍德中擢第解褐授北海主簿以治行聞再調臨濟令臨濟多淫祠有針姑廟者里人奉之尤篤衍至即焚其廟後唐天成中為鄒平令晉祖入洛累遷河陽三城節度副使檢校左庶子知州事居半歲得家問父在青州有風痺疾衍不奏棄官去侍疾不復有仕宦意歲餘父疾不能起衍親自掬矢未嘗少倦

晉祖聞之召為工部郎中樞密直學士連使促召至闕
辭曰臣無他才術未知何人誤有聞達望放臣還遂其
私養晉祖曰朕自知卿非他人薦也俄廢樞密院以本
官奉朝請踰年上表請還侍養授青州行營司馬丁父
憂哀毀甚又召為駕部郎中鹽鐵判官以母老懇辭有
詔止守本官未幾復出為天平軍節度副使開運末授
左諫議大夫權判河南府召拜御史中丞喪亂之後朝
綱不振行執憲頗有風采言御史有風憲之體自今藩

鎮幕僚勿得任臺官雖親王宰相出鎮亦不可奉充賓
佐非奉制勘事勿得出京自餘不令釐雜務詔惟辟召
入幕如故餘從其請復抗表求侍養改戶部侍郎衍又
堅乞罷免詔書褒許即與其母東歸漢乾祐末丁憂服
除詔鄆州高行周津遣赴闕衍辭以足疾不至周祖起
為尚書右丞充端明殿學士征兗州駐城下遣衍往曲
阜祠文宣王廟城平以衍權知州事歸朝權知開封時
王峻持權衍與陳觀俱為峻所引用會峻敗觀左遷衍

罷職守兵部侍郎顯德初上表求解官授工部尚書致仕還鄉里臺閣搢紳祖餞都門外冠蓋相望時人榮之太祖建隆三年卒于家年七十四行守章句無文藻然諒直孝悌為時所推

劇可久字尚賢涿州范陽人沉毅方正明律令與馮道趙鳳為友後唐同光初鳳薦於朝補徐州司法以幹職聞召為大理評事踰年遷大理丞坐誤治獄責授登州司戶遇赦召為著作郎仕晉歷官大理卿周廣順初改

太僕卿復為大理卿會鄭州民李思美妻詣御史臺訴夫私鬻鹽罪不至死判官楊瑛寘以大辟有司攝治瑛瑛具伏可久斷瑛失入減三等徒二年半宰相王峻欲殺瑛召可久謂之曰死者不可復生瑛枉殺人其可恕耶可久執議益堅瑛得免死由是忤峻改太僕卿分司西京顯德三年所舉官犯贓可久坐停任明年復起為右庶子時奉制旨刪定律令與侍御史知雜事張湜等於都省集議刪定五年書成目曰刑統宰相請頒天下

與律疏令式並行可久復拜大理卿太祖建隆三年告

老改光祿卿致仕

按長編據會要載建隆三年八月朔敕大理卿范陽劇可久為光祿卿致

仕可久年逾七十無請老意帝特命之

卒年七十七可久在廷尉四十年

用法平允以仁恕稱

趙逢字常夫媯州懷戎人性剛直有吏幹父崇事劉守

光為牙校後唐天祐中莊宗遣周德威平幽州因誅崇

逢尚幼德威祿為部曲令與諸子同就學及德威戰沒

逢乃游學河朔間久之西游客鳳翔李從曠門下從曠

卒侯益領節制逢又依之漢乾祐中益入為開封尹表逢為巡官逢求舉進士是歲登甲科解褐授秘書郎直史館仕周累官皆兼史職太祖即位拜中書舍人征澤潞逢從行次河內聞李筠擁兵為變又盧太行艱險乃妄言墜馬傷足留於懷州駕還京有密旨除拜逢當草制又稱疾不入太祖謂宰相曰此人得非規避行役者耶對曰誠如聖言遂貶房州司戶會思量移汝州司馬乾德初召授都官郎中知制誥充史館修撰判館事二

年改判昭文館未幾充樞密直學士加左諫議大夫蜀
平出知閬州時部內盜賊攻州城逢防禦有功代還遷
給事中充職六年權知貢舉太祖征太原以逢為隨軍
轉運使鑄印賜之會發諸道丁壯數十萬築堤壅汾水
灌晉陽城逢白太祖乞劾用即命督其版築時方盛夏
逢於烈日中親課力役因邁疾興歸京師開寶八年卒
逢敦歷清近所至有聲然傷慘酷又言多詆訐搢紳目
之為鐵縶大中祥符三年特詔錄其子樞為三班借職

蘇曉字表東京兆武功人後唐長興初辟鄧州從事漢
祖鎮太原表為觀察支使周廣順初為大理正以讞獄
有功遷少卿顯德中厯屯田郎中太祖即位詔與竇儀
等同詳定刑統及編敕建隆四年權大理少卿事遷度
支郎中乾德三年出為淮南轉運使建議權薪黃舒廬
壽五州茶置十四場規其利歲八百餘萬緡開寶三年
遷司勳郎中改西川轉運使仍掌京城市征先是朝廷
遣供備庫使李守信市木秦隴間守信盜官錢鉅萬既

受代為部下所發守信至中牟自剄太祖命曉案之逮捕甚衆右拾遺通判秦州馬適妻李即守信息女守信嘗用木為筏以遺適曉得守信所送書以進太祖將捨之曉固請寘於法仍籍其家餘所連及者多致破產盡得所隱沒官錢擢拜曉右諫議大夫判大理寺遷左諫議大夫七年監在京商稅九年卒年七十三曉深文少恩當時號為酷吏及卒無子有一女甚鍾愛亦先曉卒人以為深刻所致

高防字修已并州壽陽人性沉厚守禮法累世將家父從慶戍天井闖與梁軍戰死防年十六護柩以歸事母孝初張從恩為北京副留守奏攝太原府倉曹掾從恩移澶州防禦使表為判官有親校段洪進盜官木造器市取其直從恩將殺之洪進懼紿曰判官使為之從恩詰防既引伏洪進得免從恩遺防錢十千馬一匹遣之防拜受而去終不自明既而悔之命騎追防還居歲餘稍稍有言防自誣以活人從恩益加禮重從恩入為樞

密副使防授國子監丞從恩留守西洛又為推官召拜
殿中丞充鹽鐵推官母憂服除隨從恩厯鄆晉潞三鎮
判官契丹入汴晉主北行從恩欲歸款防為陳逆順請
固守臣節從恩不用其言遂歸契丹既行命副使趙行
遷知留後從恩所親王守恩為巡檢與防同領郡事防
與守恩誅行遷以城歸漢祖漢祖召防赴太原加檢校
金部郎中乾祐初授屯田員外郎改浚儀令時楊邠用
事與防有隙未幾免職周祖即位起為刑部員外郎改

開封令遷本府少尹除刑部郎中宿州民以刃殺妻妻
族受賂偽言風狂病瘖吏引律不加掠拷具獄上請覆
防云其人風不能言無醫驗狀以何為證且禁繫踰旬
亦當須索飲食願再劾必得其情周祖然之卒寘於法
世宗尹京以防為判官即位拜左諫議大夫遷給事中
從征淮南初下泰州即命防權知州事兼判海陵監事
會吳師至迺遷州民入牙城分兵固守以俟外援俄揚
帥韓令坤馳騎召防吳軍復至廣陵防與令坤敗之詔

書嘉獎改左散騎常侍復歷知蔡宋二州再從世宗南
征判行泗州城降命防知州事復知蔡州遷戶部侍郎
世宗謀取蜀以防為西南面水陸轉運制置使屢發芻
糧赴鳳州為征討之備太祖即位征李筠防又為潞州
東北路計度轉運使澤潞平拜尚書左丞建隆二年出
知秦州州與夏人雜處罔知教養防齊之以刑舊俗稍
革州西北夕陽鎮連山谷多大木夏人利之防議建採
造務闢地數百里築堡要地自渭而北夏人有之自渭

而南秦州有之募卒三百歲獲木萬章夏部桑布沁等
率諸族千餘人涉渭奪木筏殺役兵防出與戰俘四十
七人以獻太祖慮擾邊郡詔諭酋帥賜所獲之俘錦袍
銀帶以遣之遂罷採木之役命吳廷祥為節度以代防

歸朝為樞密直學士尚書左丞乾德元年權知鳳翔府

未幾卒

按長編載乾德元年夏五月辛酉命樞密直學士尚書左丞高防權知鳳翔府又于本年載冬

十二月庚子尚書左丞高防卒於鳳翔宋史本傳不載其為尚書左丞又書出知鳳翔于乾德元年前今據長

編改年五十九太祖甚悼惜賜其子太府寺丞延諸詔曰

爾父有幹蠱之才懷匪躬之節朕所毗倚遽茲淪亡聞之盡傷不能自己矧素尚清白諒無餘資殯殮所須特宜優恤今遣供奉官陳彥珣部署歸葬西洛凡所費用並從官給

馮瓚字禮臣齊州歷城人性便佞任數務巧進父知兆從唐司農卿瓚以蔭補秘書省校書郎遷太子右贊善大夫漢初改監察御史仕周至祠部郎中充集賢院直學士太祖即位轉兵部郎中瓚有吏材太祖甚寵之擢

拜左諫議大夫出知舒州境內有菰蒲魚鱉之饒居民採以自給防禦使司超盡征之瓚奏奪民利請蠲除從之徙知廬州以本官充樞密直學士時劔外初平卒有亡命者散匿為盜命瓚知梓州無何蜀軍校上官進率亡命三千餘人掠民數萬夜攻州城瓚曰賊乘夜奄至此烏合之衆以篳梃相擊必無固志正可持重以鎮之曰自潰矣城中止有雲騎兵三百令分守城門瓚坐城樓密令促更籌未夜分擊五鼓賊悉遁去因縱兵追之

擒上官進斬於市誘其餘黨千餘人並釋其罪境內獲
安初太祖欲任用瓚常與趙普言瓚有奇材普忌之乃
遣詣蜀平寇潛令所親信從其行密察其過即亡入京
師擊登聞鼓訟瓚受賕為姦事急召歸闕親問之詞理
屢屈乃屬吏既而普遣人至潼關閱其囊裝得金帶珍
玩之物皆封題將以賂劉整整方在太祖幕府瓚具伏
普言法當死太祖欲貸之普固執不可乃削籍流登州
沙門島瓚在海上凡十年不得召開寶末遇赦放還太

宗即位授左贊善大夫太平興國元年與禮部員外郎
賈黃中左補闕程能分掌左藏三庫先是貨泉與金帛
通至是以帑藏充溢乃命分之判大理寺改度支判官
遷秘書少監充職太宗親征太原以瓚為隨駕三司判
官凱旋改大理卿兼判秘書省以足疾求解除給事中
致仕復舊勲階五年卒年六十七子克忠至內殿崇班
閣門祇候

邊珣字待價華州鄭人晉天福六年舉進士解褐秘書

省校書郎直弘文館漢乾祐初為右拾遺加朝散大夫
周廣順元年遷右補闕顯德中累授職方員外郎知通
州珣課鬻鹽於狼山歲增萬餘石太祖即位詣衛州視
秋稼及掌京倉建隆二年兄自玠河南令入為吏部員
外郎復以珣為洛陽令兄弟迭尹赤邑時人榮之乾德
初召為倉部郎中蜀平知三泉縣開寶初遷職方郎中
監京兆勦務又掌永安軍權貨奏徙務揚州有富民訴
廣陵尉謝圖殺其父本部收尉囚之官吏推劾累三百

日獄未具州以狀聞詔珣案鞫盡得其實乃富民以私憾誣告尉即反坐之就命權知州事仍兼權貨務罷郡又兼掌酒稅鹽礬務丁毋憂起復知州事會征江表兼領淮南轉運使金陵平知江北諸州轉運事太宗即位遷吏部郎中充廣南轉運使初至桂州守張頌卒頌淮州人藁葬城外舊制不許以族行僕人乃分匿其家財珣召官吏悉追取之部送其柩歸濰州又屬郡守與護軍有忿隙者但奏令易地不致之於罪太平興國五年

拜右諫議大夫領吏部選事七年移知開封府明年卒
年六十三珣強幹有吏材帝方欲倚用聞其卒甚嗟惜
之珣一子早卒以其從子俊為尉氏主簿兄玠至金部
郎中弟玠右贊善大夫從子倣至殿中丞倚為比部員
外郎

王明字如晦大名成安人晉天福中舉進士不第驍騎
將藥元福為原州刺史辟為從事馮暉節制靈武表為
觀察巡官周黃順初元福領陳州防禦使奏署判官劉

崇起兵晉州命元福將兵援之事多咨於明先是州縣吏部送丁壯餉糧一夕夫盡遁去元福怒盡驅官吏出軍門將就戮明馳往止之入白元福曰今軍儲無闕丁夫數萬人文吏懦不能制斬之何益寬以待之凱旋無專殺之名不亦善乎元福感悟盡免其死既而崇衆宵遁即命元福為建雄軍節度留鎮因奏署明為書記顯德初元福移鎮陝恃功驕恣明直道見疎求歸省元福數召明明謝絕之詣闕上書求任州縣歷清平鄆城二

縣令太祖即位荆南高繼沖入覲授彭門節鉞以明為
武寧軍節度掌書記乾德初召公卿近臣各舉清白有
吏幹者一人給事中馬士元以明塞詔為左拾遺蜀平
選知榮州代歸遷右補闕會用兵嶺南選為荆湖轉運
使開寶三年大舉南征明為隨軍轉運使山路險絕舟
車不通但以丁壯數萬人轉運供億不闕每下一郡一
城必先保其簿書守其倉庫既而賀州未下明與主帥
計曰當急取之恐援兵至則我師勝負未可知諸將頗

猶豫明乃擐甲胄率所部護送輜重卒百人擁丁夫數千畚鍤皆作堙其塹直抵城門城中懼閉門納款遂據有之因抵廣州賊衆十餘萬拒戰是夕大風發屋折木衆乃驚懼明與都部署潘美等謀命丁夫數千人持二炬間道先搗賊壘大軍蓐食陣以待之俄萬炬皆發焚其柵賊驚果來犯大軍因迎擊之賊大敗劉鋹以城降廣州平為本道轉運使太祖嘉其功擢授秘書少監領韶州刺史充轉運使俄以潘美尹崇珂為嶺南轉運

使明為副使明徧歷部內視民疾苦舊無名科斂悉條
奏除之嶺表遂安七年代歸帝召見勞問賜衣帶鞍馬
是歲將用師南唐以明為黃州刺史帝密受成算明既
視事即完葺城壘訓練士卒衆莫解其意俄王師自荆
渚乘戰艦而下即以明為池州至岳州江路巡檢戰權
都部署擊鄂州軍於江南斬首三百級又破萬餘人於
武昌殺江南軍七百人拔樊山砦破江州軍又破江南
軍於江中獲船十餘艘又擊敗湖口軍萬餘衆奪戰艦

五百艘時南唐將朱令贇自上江領衆十五萬連大艦沿流而下將焚采石浮梁抵金陵為援明率所部舟師屯獨樹口遣其子馳奏請漆造戰艦三百艘以襲令贇帝曰非應急策也令贇朝夕至金陵之圍解矣乃密遣人諭明令樹長木於州浦間若帆檣之狀令贇望見之果疑大軍襲其後逗撓不敢進明移檄諸軍相為犄角因督兵擢襲之至小孤山與諸軍合勢大破之擒令贇金陵平詔明安撫諸郡因命知洪州太宗即位兼領江南

諸路轉運使召為右諫議大夫充三司副使太平興國
七年與侯陟同判三司事八年詔分三司各命使領之
改左諫議大夫為鹽鐵使遷給事中雍熙四年改光州
刺史出知并州端拱元年代還表求換秩改禮部侍郎
契丹來侵詔以明知真定府敵遂遁去淳化初歸闕知
京朝官差遣事二年卒年七十三子挺扶並進士及第
挺至殿中侍御史扶嘗直集賢院至工部員外郎景德
中錄幼子授為光祿寺主簿大中祥符八年又錄其孫

師顏為三班借職授至殿中丞

許仲宣字希祭青州人漢乾祐中登進士第時年十八周顯德初解褐授濟陰主簿考功員外郎張乂薦為淄州團練判官太祖即位赴調引對便殿仲宣氣貌雄偉太祖悅之擢授太子中允受詔知北海軍仲宣度其山川形勢地里廣袤可為州郡因畫圖上之遂升為濰州初議建牧馬監令仲宣行視諸州頗得善地從征并門掌給納四十餘州資糧悉能集事帝益知其彊幹開寶

四年知荆南轉運事及征江南又兼南面隨軍轉運事
兵數十萬供饋無闕南唐平以漕輓功拜刑部郎中九
年詔知永興軍府事太宗嗣位遷兵部郎中驛召赴闕
授西川轉運使屬西南夷寇鈔邊境仲宣親至大度河
諭以送順示以威福夷人率服會言事者云江表用兵
時仲宣乾沒官錢召還令御史臺盡索財計簿鈎校凡
數年而畢無有欺隱改廣南轉運使會征交州其地炎
瘴士卒死者十二三大將孫全興等失律仲宣因奏罷

其兵不待報即以兵分屯諸州開庫賞賜草檄書以諭
交州交州即送款內附遣使修貢仲宣復上章待罪帝
嘉之太平興國六年遷吏部郎中八年與膳部郎中知
雜膳中正兵部郎中劉保勳刑部郎中辛仲甫皆以久
次郎署擢陞諫垣仲宣為右諫議大夫召還以本官權
度支雍熙四年出知廣州未上移知江陵府改河南府
端拱中遷給事中淳化元年卒年六十一仲宣性寬恕
侗儻不檢有心計初為濟陰主簿時令與簿分掌縣印

令畜嬖妾與其室爭寵令弗能禁嬖欲陷其主竊取其印藏之封識如故以授仲宣翼日署事發匣則無其印因逮捕縣吏數輩及令簿家人下獄鞠問果得之於令舍竈突中令聞之倉皇失措仲宣處之晏然人服其量嘗從征江南都部署曹彬令取陶器數萬給士卒為燈具仲宣已預料置奉之如其數其才幹類此子待用至國子博士待問再舉及第至殿中丞待旦至比部員外郎待用子巨源亦登進士第

楊克讓字慶孫同州馮翊人晉末舉進士不第州將劉繼勳辟為戶曹掾漢乾祐中本府節度張彥成表授掌書記周廣順初彥成移鎮安陽穰下克讓以舊職從行彥成入為執金吾病篤奏稱其材可用克讓以彥成死未葬不忍就祿退居別墅俟張氏子外除時論稱之歷鎮寧軍掌書記顯德二年調授鳳翔府司錄參軍加兼監察御史以祖母老解官歸養未幾改延州觀察推官與通判宋琪並為節度使趙贊所禮累加朝散大夫兼

殿中侍御史連以家難去職太祖素知其名會贄入覲復稱其才即起為左補闕掌斡口權貨務乾德六年知果州上言願畢襄事特賜緡錢許葬畢赴任開寶三年就命為西川轉運副使蜀民懷其善政璽書褒美代歸疏民利病十事稱旨太祖召升殿賜坐勞問將大用為侯陟所沮事見陟傳征南唐命克讓知昇州行府昇州平就知州事兼水陸計度轉運使事加兵部員外郎太平興國初就加刑部郎中知大名府會錢俶陳洪進來

歸疆土以克讓為兩浙西南路轉運使泉州民嘯聚為盜克讓在福州即率其屯兵至泉州與王文寶共討平

之

按宋史本傳云與王明王文寶共討平之考長編太平興國三年末載陳洪進納土帝即命其子文顯知

泉州議擇能臣閩掌州事殿中丞南頓喬惟岳方居父喪詔起惟岳為通判惟岳始至會仙遊莆田百草寇乘虛嘯聚十餘萬來攻城城中兵才三千勢甚危急監軍何承矩王文寶欲盡屠其城熡府庫而遁惟岳抗議以為朝廷任以綏遠之寄今惠澤未遍盜賊連結反欲屠城焚庫豈詔意哉承矩等因復堅守時西浙西南路轉運使楊克讓在福州遂率屯兵往救之圍既解監軍軍器庫副使王繼昇率精兵二百騎夜出追擊悉擒其魁首械送闕下草寇悉平云並未王明共討平之事即王明傳亦不載討平衆寇今將王明二字刪

四

年徙知廣州俄兼轉運市舶使明年卒年六十九克讓
少好學手寫經籍盈篋歷官廉幹所至有聲每視事自
旦至暮或通夕斷決如流時稱能吏子希閔生而失明
令諸弟讀經史歷耳輒不忘屬文善緘尺趙普守西洛
府中牋疏皆希閔所為將奏署本府掾固辭不受卒年
三十九自教三子曰華日嚴日休皆登進士第希閔弟
希甫淳化三年進士從子曰宣亦登進士第

段思恭澤州晉城人父希堯仕晉累陟清顯思恭以門

蔭歷官華商等州觀察支使劉繼勳節制同州辟掌書
記繼勳入朝會契丹入汴軍士誼諫請立思恭為州帥
思恭諭以禍福乃止漢祖建國授左補闕隱帝時蝗徧
祈山川思恭上言獄訟平允則災害不生望令諸州速
決重刑無致淹濫必召和氣從之歷度支駕部周顯德
中定濱州田賦世宗嘉之拜左司員外郎太祖建隆二
年除開封府令遷金部郎中乾德初平蜀通判眉州時
亡命集衆攻邛州城刺史趙廷進懼不能敵將奔嘉州

思恭止之因率屯兵與賊戰彭山人無鬪志思恭募軍士先登者厚賞於是諸軍費勇大敗賊思恭矯詔以上供錢帛給之後度支請按其罪太祖憐其果幹不許令知州事俄召為考功郎中知泗州會馮繼業自靈州舉宗來朝帝以思恭代知州事仍語之曰馮繼業言靈州非衛霍名將鎮撫之不可汝其往哉思恭曰臣奉詔而往必能治之帝壯之思恭下車矯繼業之失綏撫戎人訪求民病悉奏免之俄而回鶻入貢路出靈州交易於

市思恭遣吏市硃砂吏爭直與之競思恭釋吏不問械
其使數日始貫之使還愬其主復遣使齎牒詣靈州問
故思恭理屈不報自是數年回鶻不復入貢久之遷右
諫議大夫知揚州朝廷方經畧江表命思恭兼沿江巡
檢每出巡委州事於通判以牌印自隨驛書自京師來
者令齎至其所事多稽滯因與通判李岵相告訐詔以
屬吏思恭辭不直責授太常少卿改知宿州太宗即位
遷將作監知秦州坐擅借官庫銀造器又假貢奉名賤

市狨毛虎皮為馬飾為通判王廷範所發降授少府少
監知邢州太平興國六年遷少府監雍熙元年再為右
諫議大夫二年知壽州端拱初遷給事中尋知陝州淳
化三年卒年七十三思恭以門資歷顯官不知書無學
術然踐更吏事所至亦著勤績子惟一三司度支判官
從子惟幾第進士仕至兵部員外郎

侯陟淄州長山人漢末舉明經周廣順初試校書郎為
西州回鶻國信使判官還補雷澤主簿司門員外郎姚

恕凡四薦陟為襄城令汝州防禦判官濮陽襄邑令太祖建隆初為寃句令以清幹聞擢左拾遺仍知縣事節度袁彥頗為不法陟抗章言之累官左司員外郎改度支員外郎依前充判官開寶五年復為左司員外郎六年權判吏部銓詔與戶部員外郎知制誥王祐等同知貢舉未鎖宿出知揚州會出師收金陵陟以所部敗南唐軍千人於宣化城俄為部下所訟追赴闕陟度理窮乃求哀盧多遜多遜素與陟善為其畫計時江表未拔

太祖厭兵南土暑熾軍卒疫死方議休兵以為後圖陟
適從揚州來知金陵危甚多遜令上急變求見陟時被
病令掖入即大言曰南唐平在朝夕陛下柰何欲班師
願急取之帝屏左右召升殿問狀遂寢前議並赦陟罪
復知吏部選事太平興國初遷戶部郎中俄選人有妄
冒事發詞涉陟南曹雷德驤將劾之陟自首出為河北
轉運使征太原為太原東路轉運使駕還次鎮州命先
還上都供頓軍需以功遷左諫議大夫權御史中丞事

按長編云權
中丞始此

三司使王仁瞻左降以陟與王明同判三

司八年卒贈工部尚書陟有吏幹性狡獪好進善事權
貴巧中傷人陟素忌楊克讓偵知太祖欲大用之因奏
事帝問識楊克讓否陟曰臣與克讓甚善知其人
誠佳士也近聞其自言上許以大用多市白金作飲器
以自奉臣頗怪之帝怒亟令克讓出典郡其險詖如此
李符字德昌大名內黃人漢乾祐中郭從義表為京兆
府戶曹掾楊恪薦為大理正太祖乾德中知歸州轉運

司制置歸朝以京西諸州錢帛不登選知京西南面轉
運事奏便宜百餘條凡四十八事命著為令因奏對稱
旨遷起居郎荆湖轉運許仲宣隨軍討南唐詔符赴荆
湖調發芻糧符領船數千艘順流而下符又建議鑿橫
江河以通漕運發和州三縣丁壯給其役太祖欲幸西
京有事于南郊符上書陳八難曰京邑凋弊一也宮闕
不備二也郊廟未修三也百司不具四也畿內民困五
也軍食不充六也壁壘未設七也千乘萬騎盛夏扈行

八也不從改比部員外郎判刑部太平興國初遷駕部
轉祠部郎中知廣州兼轉運使五年召為右諫議大夫
判吏部銓兼大理寺尋代范旻為三司副使坐與官屬
競課最罷職守本官七年開封尹秦王廷美出守西京
以符知開封府廷美事發太宗令歸第省過趙普令符
上言廷美在西洛非便恐有他變宜遷遠郡以絕人望
遂有房陵之貶普恐泄言坐符用刑不當貶寧國軍行
軍司馬盧多遜之貶崖州也符白普曰珠崖雖遠在海中

水土頗善春州稍近瘴氣甚毒至者必死願徙多遜處
之普不答先是太宗尹京符因宋琪薦弭德超藩邸事
符貶德超為樞密副使屢稱其寃會德超以事貶帝惡
其朋黨徙符嶺表普移符知春州至郡歲餘卒年五十
九符無文學有吏幹好希人主意以求進用終以此敗
至道二年郊祀追復諫議大夫祥符五年錄其子璜試
將作監主簿

魏丕字齊物相州人頗涉學問周世宗鎮澶淵辟司法

參軍有盜五人獄具丕疑其寃緩之不數日果獲真盜
世宗嘉其明慎厯頓邱冠氏元城三縣令世宗即位改
右班殿直出監明靈砦軍征淮甸丕獲江南謀者四人
部送行在詔獎之遷供奉官供備庫副使太祖即位改
作坊副使一日語丕曰作坊久積弊爾為我修整之丕
在職盡力以久次轉正使開寶九年領代州刺史凡典
工作十餘年太祖平諸路皆先期令修勦器械無不精
辦雍熙四年代郝正為戶部使端拱初遷度支使出為

黃州刺史還朝召對便坐賜御書急就章朱邸集丕退
作歌以獻因自述願授臺省之職太宗面諭曰知卿本
儒生然清望官奉給不若刺史之優也淳化初改汝州
刺史歷知鳳州改襄州境內久旱丕以誠禱之一夕雨
沾足召還表求致仕授左武衛大將軍仍領汝州刺史
俄判金吾街仗初六街巡警皆用禁卒至是詔左右街
各募卒千人優以廩給使傳呼備盜丕以新募卒引對
遂分四營營設五都一如禁兵之制改領郢州刺史俄

改領復州遷左驍衛大將軍咸平二年卒年八十一丕
好歌詩頗與士大夫遊接有時稱南唐主李煜妻卒遣
丕充弔祭使且使觀其意趣煜邀丕登昇元閣賦詩丕
有朝宗海浪拱星辰之句以風動之太宗嘗賜詩令丕
與柴禹錫和焉

董樞真定元氏人後唐清泰中以獻書授校書郎累應
賓佐晉天福中為左拾遺知樞密院表奏周廣順初為
左補闕世宗即位詔常參官各奏封事樞上平吳策淮

南平遷浚儀令恭帝即位遷殿中侍御史太祖乾德初
遷主客員外郎上書請伐蜀蜀平通判劍州會全師雄
叛攻劔刺史張仁謙足疾不能戰欲棄城走樞戰敗之
因招餘衆降仁謙飲樞令醉密殺降數百誣奏樞與賊
通會中使自成都還備言其事太祖並召之廷辨曲直
仁謙屈下御史臺鞠之黜宋州教練使以樞嘗貢西伐
計遷比部郎中三年出兼桂陽監使上書請伐廣南詔
益桂陽戍卒三千令樞統之開寶二年又上方略會劉

銀命內侍曾居實侵桂陽樞擊退之三年大舉伐銀令
樞率兵趨連口克之改兵部郎中權知連州兼行營招
撫使四年移知襄州又為河北轉運使改判西京留司
御史臺以前桂陽監任盜賊坐死

欽定續通志卷三百十一

欽定四庫全書

欽定續通志卷三百十二

列傳

宋
十六

馬令琮

杜漢徽

張廷翰

蔡審廷

周廣

石曦

張藏英

解暉

王晉卿

郭廷謂

延濬

趙延進

輔超

馬令琮本名令威避周祖名改之大名人父全節五代
史有傳全節歷節度皆署令琮為牙校累授彰德牙內
都指揮使檢校尚書左僕射領勤州刺史令琮少善騎
射嘗從其父平安州及與鎮州安重榮戰皆有功由是
知名晉開運二年全節卒令琮起復拜隰州刺史仕漢
為西京巡檢使仕周累領建州刺史太祖即位出刺懷
州會將親征李筠召三司張美餉其食美言河內密邇
上黨令琮日夜儲蓄以俟王師太祖善之命授團練使

執政言令琮方供億大軍不可移他郡故升懷州為團
練以令琮充使又充先鋒都指揮使澤潞平為昭義兵
馬鈐轄踰年被疾詔許歸郡乾德元年卒年三十九太
祖甚憐之錄其子延恩為殿直

杜漢徽京兆長安人父阿孫為太原威勝軍使漢徽有
膂力善騎射年十七仕後唐累遷護聖軍使晉天福六
年與慕容鄴等討安州李金全生禽指揮使孫厚以功
遷興順指揮使八年從鎮州征安重榮改護聖指揮使

贈阿孫為左贊善大夫開運二年以所部戍深州破契丹于樂壽殺獲甚衆漢初從高行周討杜重威于鄴屢為流矢所中身被重創猶力戰觀者壯之又率所部戍鎮州破契丹于靈壽周世宗征劉崇漢徽有戰功補龍捷左第五軍都虞候移所部屯安平縣破契丹于縣南遷本軍左第四軍都虞候太祖即位補本軍都校領茂州刺史改領潮州從平李筠又從平李重進錄功居多建隆三年出為天長軍使移雄武軍使知屯田事是冬

被病即以符印授通判宋鸞請告歸京家人勸其求醫
藥漢徽笑曰我在戎行四十年大小百餘戰不死幸矣
安用藥為未幾卒

張廷翰冀州信都人父慎圖仕周為兵部郎中廷翰少
慷慨有智略善騎射晉天福中冀州刺史張建武召補
牙校其後刺史李冲署為本州牢城軍校契丹入中原
署其黨何行通為刺史契丹主道殂州人共殺行通推
廷翰知州事漢初就拜刺史廷翰盡捕殺行通者戮于

市為政寬厚簡易民甚愛之周廣順初召赴闕周祖見其貌魁偉謂樞密使王峻曰冀州近邊雖更擇人亦無踰廷翰者即日遣還在郡八年契丹將高牟翰

遼史作高樓翰

數擾邊皆為廷翰擊走顯德中歷棣海沂三州團練使屢率兵敗淮人移萊州太祖即位又歷冀亳二州乾德

二年卒年四十七

按宋史此下有吳虔裕傳無事蹟足錄今刪

蔡審廷磁州武安人少能騎射晉初應募補護聖散都頭周顯德初擢為殿前散員轉鐵騎副兵馬使從世宗

戰高平有功遷軍使太祖從世宗征淮南審廷隸麾下
預戰紫金山改副指揮使太祖即位授殿前散都頭指
揮使從征李筠攻澤州先登為飛石傷足建隆中領富
州刺史兼內外馬步軍副都軍頭乾德初授冀州刺史
征太原時為北面步軍都指揮使屯兵易州審廷訓練
士卒甚整太祖過鎮陽見于行在所賜名馬寶劍命為
鎮州兵馬都鈐轄開寶八年卒年六十九

周廣字大均其先應州神武川人父密事晉厯廊延晉

三鎮節度使周廣順初至太子太師致仕廣幼從其父
為牙校漢初授供奉官未幾擢左千牛衛將軍周祖討
慕容彥超以廣為行營都監從世宗征淮南既得江北
數州即命廣勞來安集民甚德之因領常州刺史兼內
外馬步軍都軍頭淮南平改眉州刺史太祖即位授隰
州刺史乾德三年遷潘州團練使令訓練雄武諸營開
寶二年從征太原為攻城樓櫓戰權都部署師還加內
外馬步軍副都軍頭六年改右屯衛大將軍領郡如故

太平興國二年卒

按宋史此下有張勳傳無事蹟足錄今刪

石曦并州太原人晉祖弟韓王敬暉之子

按五代史晉家人傳韓王

敬暉字德明宋諱敬故止稱韓王暉今增

天福中以曦為右神武將軍歷漢

至周為右武衛右神武二將軍恭帝立初為左衛將軍

會高麗王昭加恩命曦副左驍衛大將軍戴交使建隆

三年再使高麗遷左驍衛大將軍護秦州屯兵西人犯

邊曦率所領擊破之斬其渠帥太祖征晉曦領兵二千

人自澤潞除道至太原壅汾水灌其城又益兵千人部

攻遼州俄知雄州代為潭州銓轄開寶八年領兵敗南
唐軍二千餘于袁州平梅山板倉諸洞蠻寇太平興國
中歷右神武右羽林大將軍連知孟襄二州遷領誠州
刺史雍熙四年改知霸州兼部署會陳廷山謀以平戍
軍叛入北邊曦察知之與侯延濟定計禽廷山以獻錄
其功加領本州團練使同知鎮州淳化二年移原州遷
右龍武軍大將軍被病請告四年卒年七十四

張藏英涿州范陽人自言唐相嘉貞之後唐末舉族為

賊孫居道所害藏英年十七僅以身免後逢居道于幽
州市引佩刀刺之不死為吏所執節帥趙德鈞壯之釋
而不問以補牙職藏英後聞居道避地關南乃求為關
南都巡檢使至則微服攜鐵棍匿居道舍側伺其出擊
之遂禽歸設父母位陳酒肴縛居道于前號泣鞭之傷
其肉經三日剝其心以祭詣官首服官為上請而釋之

燕薊間目為報讐張孝子契丹用為盧臺

按宋地理志
通鑑俱作蘆

臺軍五代史周祖本紀
作盧臺與宋史本傳同

軍使兼榷鹽制置使周廣順三

年率內外親屬并所部兵千餘人及煮鹽戶長幼七千餘口牛馬萬計舟數百艘航海歸周至滄州刺史李暉以聞周祖頗疑之令館于封禪寺數月世宗即位授德州刺史未幾召歸對便殿詢以備邊之策藏英請于深州李宴口置砦及誘境上亡命者以隸軍願為主將得便宜討擊世宗率從之以為沿邊招收都指揮使藏英遂築城李宴口累月募得勁兵數千人會遣鳳翔節度王彥超巡邊為契丹所圍藏英率新募兵馳擊之轉戰

十餘里契丹解去改濮州刺史仍領邊任契丹將高牟

翰以精騎數千擾邊藏英逆擊于胡盧河北

按高牟翰即遼之高

橫翰胡盧河宋史王彥超傳亦載此事作胡盧河攻高

應惡元年即周祖廣順元年故宋史張廷翰傳所載高牟翰擾邊事亦在周廣順初也處乃在世宗即位後與

遼史并張廷翰傳俱不合自旦至晡殺傷甚衆值暮收兵契丹遁去

後因領兵巡樂壽契丹幽州驍將姚內斌偵知藏英兵

少以精騎二千陣于縣之北藏英率麾下擊之自辰至

申士皆殊死戰內斌遂解去世宗降璽書褒美征瓦橋

關為先鋒都指揮使敗契丹騎數百于關北下固安縣
改關南排陣使太祖即位遷瀛州團練使并護關南軍
建隆三年卒于治所年六十九孫鑑自有傳

按宋史此下有陸萬

友傳無事蹟
足錄今刪

解暉洺州臨洺人父珪應募為州兵後唐天成中西征
至劍門沒于陣暉少有勇力以父死戎事得隸兵籍戍
鴈門與契丹接戰斬首七級獲酋長一人以功遷奉國
軍隊長晉天福中安重榮反鎮州因舉兵向關至宋城

晉師逆戰大破之暉募軍中壯士百餘人夜擣賊壘殺
獲甚衆暉頻中流矢而督戰自若顏色不撓遷本軍列
校仕周累遷虎捷第一軍都虞候太祖即位從征澤州
力戰目中流矢師還策勲為內外馬步軍副都軍頭建
隆四年充湖廣道行營前軍戰擢都指揮使潭州平璽
書獎諭偽統軍黃從志據岳州暉率舟師討平之生禽
從志改控鶴右第二軍都指揮使領高州刺史乾德六
年詔領所部軍屯上黨從李繼勲畧太原開寶九年破

太原軍于境上改均州刺史太平興國二年

宋史地理志作三年

詔于潞州北亂柳石圍中築城名威勝軍以暉為軍使
從征并州與尚食使石彥贇率所部先下隆州禽招討
使李詢等以獻于行在所復令與彥贇督戰士隸城西
行營分攻太原劉繼元降太宗以太原宮女三人賜暉
俄遷本州團練使知霸州雍熙初充雲應寰朔忻代等
州都巡檢使三年代歸本郡淳化二年被病上章告老
改右千牛衛上將軍致仕詔未至而卒年八十暉鷲猛

木強安受詔征伐常身先之人所憚者暉視之若甚易
由是頗立戰功金創徧體時稱驍將子守顯至內殿崇

班閣門祇候

按宋史此下有李穀傳無事實足錄今刪

王晉卿河朔人少勇敢為鄰里所推周世宗在澶淵晉
卿以武藝求見得隸帳下及即位補東頭供奉官從戰
高平征淮甸每遣宣傳密旨甚親信之洎北征為先鋒
都監督戰有功詔權控鶴都虞候克關南授軍器庫使
顯德四年為龍捷右第一軍都指揮使領彭州刺史恭

帝立出為濱州刺史太祖乾德中為興州刺史移漢州
時蜀初平寇盜充斥晉卿嚴武備設方略禽捕剪滅靡
有遺漏自是雖劇賊無敢窺其境然以賄聞太祖惜其
才而不問秩滿歸闕求養疾改左監門衛將軍奉朝請
未幾詔戍北邊疆場清肅開寶四年復授莫州刺史在
郡謹斥候善撫循士卒皆樂為用邊民安堵六年卒年
六十七

郭廷謂字信臣徐州彭城人父全義仕南唐為濠州觀

察使廷謂幼好學工書善騎射補殿前承旨改濠州中
軍使李景每令領中朝機事入奏全義卒擢莊宅使濠
州監軍周世宗攻淮右南人屢敗城中甚恐廷謂與州
將黃仁謙為固禦之計周師遣謀以鐵券及其壘廷謂
拒之城內負販之輩率不逞廷謂慮其亡逸籍置大寺
遣兵守之給日食俾製防城具隨其所習以故周師卒
不得覘城中虛實周師為浮梁渦口命張從恩焦繼勳
守之廷謂語仁謙曰此濠壽之患也彼以騎士勝故利

于陸我以舟師銳故便于水今夏久雨淮流汎溢願假舟兵二千斷其橋直抵壽春仁謙初沮其議不得已從之即輕權銜枚抵其橋麾兵斷策悉焚之周師大斲焚其資糧而還授武殿使周師退保定遠又募壯士為負販狀入定遠偵軍多寡及守將之名還曰武行德周務勅也廷謂曰是可圖也又籍鄉兵萬餘洎卒五千日夕訓練依山銜枚設伏破之周師大潰行德單騎脫走時有以玉帛子女餉廷謂者悉拒之惟取良馬二百匹以

獻以功為滁州刺史上淮巡檢應援兵馬都監及紫金山之戰南唐諸將多歸降者獨廷謂以全軍還守濠州追不能及時濠守欲棄城走廷謂止之俄知本州團練使繕戈甲治溝壘常若敵至是秋周師復至表于景請援且言周兵四臨乞早辭請和以固鄰好夜出敢死士千餘襲周營焚頭車洞屋周師蹂躪死者甚衆既而援兵不至周師急擊廷謂集諸軍壘門之外南望大慟而降于周至山陽見世宗時加宴賜拜亳州防禦使以其

弟本州馬步都校廷讚為和州刺史命攻天長軍降其將馬贛又為樓櫓戰權左右廂都監俄歸譙郡太祖即位從征上黨再知亳州乾德二年代還改絳州防禦使兩川平馮瓚知梓州為僕夫所訟召廷謂為靜江軍節度觀察留後以代之州承舊政有莊宅戶車脚戶皆隸州將鷹鷄戶日獻雉兔田獵戶歲入皮革又有鄉將都將鎮將輩互擾閭里廷謂悉除之開寶五年卒年五十四廷謂性恭謹事母以孝聞未嘗不束帶立侍子延濬

廷謂兄廷諭仕南唐太子洗馬致仕歸朝至秘書監廷
諭子延澤

延濬字利川太祖錄為供奉官屢使西北宣諭機事太
平興國初領八作司雍熙三年改崇儀使淳化四年李
順亂改西京作坊使充成都十州都巡檢使時成都將
陷延濬單騎入城與郭載議募亡卒退保劍門賊數千
來躡其後擊破之王繼恩至以延濬為先鋒壕砦使即
領兵倍道先進賊出探騎數十悉禽之盡得賊機事延

濬易旗變號賊不知覺斬闖掩入繼恩又請延濬知漢州州經兵燹解舍橋梁城砦悉毀延濬募軍民葺之又率州帑以應軍須錄功改洛苑使真宗初會河朔用兵延濬馳往邊城按視砦壘咸平二年卒子有倫為供奉

官閣門祇候

按宋史此下有延濬附傳無事蹟足錄今刪

趙延進澶州頓邱人父暉周太子太師延進頗親學嘗與軍中少年入民家競取財賄延進獨持書數十編以歸同輩哂之漢末暉願鳳翔節度未赴鎮王景崇據城

反命暉為都招討使擊之延進年十八屢當軍鋒景崇
平延進奉捷奏以入授鳳翔牙內指揮使領貴州刺史
暉徙宋州亦從為牙職改領榮州刺史睢陽有盜數百
各立酋帥為民患延進以父命領牙兵悉禽戮之詔書
褒美丁外艱表求持服既終喪周世宗征淮南延進獻
萬縑以助軍仍請對世宗召見之時延進有從兄為虎
捷都虞候帳前橫衝指揮使世宗指延進語之曰爾弟
拳勇有謀將授以禁軍大校延進自陳好讀書不願也

翼日授右千牛衛將軍濠州兵馬鈐轄從征瓦橋關為
隨駕金吾街仗使太祖即位遷右羽林軍將軍濠州都
監會代蜀以襄州當川路津要命為鈐轄同知州務蜀
平專領郡事漢江水歲壞隄害民田常興工修護延進
累石為岨遂絕其患入為兩浙漳泉國信使開寶二年
授右龍武將軍知靈州以母老願留得權判右金吾街
仗使歷知河中府梓相青三州太平興國中大軍平并
州討幽薊皆為攻城八作壕砦使嘗詔督造礮具八百

期以半月延進八日成太宗親試之大悅又令主城北諸洞子及班師命與孟元喆藥可瓊留屯定州契丹來

侵命延進與崔翰李繼隆將兵八萬禦之賜陣圖分為

八陣俾以從事師次滿城

按宋史本傳作蒲城考宋地志蒲城屬陝西永興軍路之

華州迥與遼境絕不相連惟滿城舊屬易州其地後歸契丹延進等留屯定州正與易州相近蒲城應是滿城

之訊今改遼騎坐至延進乘高望之東西亘野不見其際翰

等方按圖布陣陣去各百步士衆疑懼畧無鬪志延進謂翰等曰主上委吾等以邊事蓋期于克敵耳今敵衆

若此而我師星布其勢懸絕彼若持我將何以濟不如合而擊之可以決勝違令而獲利不猶愈于辱國乎翰等曰萬一不捷則若之何延進曰倘有喪敗則延進獨當其責于是改為二陣前後相副士衆皆喜三戰大破之獲人馬牛羊鎧甲數十萬以功遷右監門衛大將軍知鎮州及代吏民數千守關借留詔許留一年俄改右領軍衛大將軍累遷右驍衛大將軍改知鄆州淳化飛蝗不入境詔褒之遷判右金吾街仗事至道二年拜右

金吾衛大將軍咸平二年卒年七十三贈右武衛上將軍
延進姿狀秀整涉獵經史好作詩什士流以此多之
延進妻即淑德皇后之妹故在顯德興國中頗任以腹
心子昂太平興國二年登進士第至戶部郎中直昭文
館

輔超忻州秀容人家世業農超少勇悍有力晉開運中
應募隸澶州軍籍漢乾祐中趙思綰據永興判周祖護
諸將討之督兵攻城超率驍勇十七人升雲梯斫北門

樓樓壞而入士卒繼進城遂陷以功補小校顯德中從
太祖征淮南常執銳前驅定滁泗破淮陰下揚州以功
轉日騎副兵馬使太祖即位從平上黨再遷內直都知
太宗即位以超為馬軍都軍頭會親征太原冒矢石攀
堞先登身被十三創帝嘉其勇賜錦袍銀帶帛五十段
詰朝再秉城中流矢者八復加厚賜大舉襲范陽分兵
三路超隸偏將米信為田重進先鋒取飛狐蔚州遷馬
步軍副都軍頭俄出補曹州馬步軍都指揮使領峯州

刺史改樂州名歸轉都軍頭淳化三年出為德州刺史
坐誣奏使者毆殺驛吏責授右監門衛將軍領誠州刺
史五年復加都軍頭領澄州刺史真宗即位加領獎州
團練使真拜萊州團練使以年老願留京師從之景德
元年卒年七十七

欽定續通志卷三百十二

欽定四庫全書

欽定續通志卷三百十三

列傳

宋十七

楊業

延昭
王貴

文廣

荆罕儒

嗣

曹光實

克明

張暉

司超

楊業并州太原人父信為漢麟州刺史業幼倜儻任俠
善騎射畋獵嘗曰我他日為將用兵亦猶用鷹犬逐雉

免爾事劉崇以驍勇聞累遷至建雄軍節度使累立戰功所向克捷人號為無敵太宗征太原素聞其名嘗購

求之既而孤壘甚危勸其主繼元降以保生聚按九國志載劉

繼業為繼元打太原城東南頗殺傷王師及繼元降繼業猶據城苦戰帝素知其勇敢生致之令中使諭繼元

俾招繼業繼元遣所親信往繼業乃北面再拜大恸釋甲來見帝喜慰撫之甚厚復姓楊氏止名業李焘據之

以載長編又注云據國史楊業傳乃云孤壘甚危業勸其主出降以保生聚與九國志大不同按五代史垂涕

勸繼元出降者但馬峯一人寔非楊業也若業勸降則當與元同出見何用別遣中使召乎長編所載如此考

東都事畧宋通鑑諸書載業事俱與九國志同繼元既降帝遣中使召見業大

喜以為右領軍衛大將軍師還授鄭州刺史防禦使

宋史

本傳作刺史據東都事略長編兩書改

帝以業老於邊事復遷代州兼三

交駐泊兵馬都部署會契丹入鴈門業領麾下數千騎自西京而出由小徑至鴈門北口南嚮背擊之契丹大敗以功遷雲州觀察使仍判鄭州代州自是契丹望見業旌旗即引去邊將多忌之有潛上謗書斥言其短者帝不問封其奏以付業雍熙三年大兵北征以忠武軍節度使潘美為雲應路行營都部署命業副之以西上

閻門使蔚州刺史王侁軍罷庫使順州團練使劉文裕
護其軍連拔雲應寰朔四州師次桑乾河會曹彬敗於
岐溝詔美護四州之民內徙既而契丹復陷寰州業謂
美等曰今遼兵益盛不可與戰朝廷止令取數州之民
但領兵出大石路先遣人密告雲朔州守將俟大軍離
代州日令雲州之衆先出我師次應州契丹必來拒即
令朔州民出城直入石碣谷遣強弩千人列於谷口以
騎士援於中路則三州之衆保萬全矣侁沮其議曰領

數萬精兵而畏懦如此但趨鴈門北川中鼓行而往丈
裕亦贊成之業曰不可此必敗之勢也佖曰君侯素號
無敵今見敵逗撓不戰得非有他志乎業曰業非避死
特慮殺傷士卒而功不可立今君責業以不死當為諸
公先即自石朱路趨朔州將行泣謂美曰此行必不利
業太原降將天子不殺而授以兵柄非縱敵不擊蓋欲
立尺寸功以報國恩爾諸君既責業以避敵業當先死
於敵因指陳家谷口曰諸君於此張步兵強弩為左右

翼以援業轉戰至此無遺類矣美即與佻領兵陣於谷口自寅至巳佻使人登托邏臺望之以為契丹敗走欲爭其功即領兵離谷口美不能制行二十里聞業敗即麾兵却走業力戰自午至暮果至谷口望見無人拊膺大慟再率帳下士力戰身被數十創士卒殆盡業猶手刃數十百人馬重傷不能進遂為契丹所擒其子延玉亦沒馬業太息曰帝遇我厚期捍邊克敵以報反為奸臣所迫致王師敗衄尚何面目求活耶乃不食三日死

帝聞之痛惜甚下詔旌之曰故雲州觀察使楊業誠堅
金石氣激風雲挺隴上之雄才本山西之茂族自委戎
乘式資戰功方提貔虎之師以効邊陲之用而羣帥敗
約援兵不前獨以孤軍陷於沙漠勁果彥厲有死不回
求之古人何以加此可贈太尉大同軍節度賜其家布
帛千匹粟千石大將軍潘美削官三資王侁除名隸全
州劉文裕除名隸登州葉忠烈武勇有智謀練習攻戰
與士卒同甘苦代北苦寒人多服氊屨業但挾纊露坐

治軍事傍不設火為政簡易御下有恩士卒樂為之用
陣之將陷也麾下猶百餘人業謂曰汝等各有父母妻
子與我俱死無益可走還報天子衆皆感泣不去淄州
刺史王貴殺數十人矢盡遂死餘亦死無一生還者聞
者皆流涕業既沒朝廷錄其子供奉官延朗為崇儀副
使次子延玉殿直延浦延訓並為供奉官延環延貴延
彬並為殿直

延昭本名延朗後改焉為兒時多戲為軍陣業嘗曰此

兒類我每征行必以從太平興國中補供奉官業攻應
朔延昭為其軍先鋒戰朔州城下流矢貫臂鬪益急業
之死太宗憫之擢延昭以崇儀副使出知景州累遷保
州緣邊都巡檢使就加如京使咸平二年契丹擾邊延
昭時在遂城城小無備契丹攻之甚急衆心危懼延昭
悉集城中丁壯登陴護守會大寒汲水灌城外旦悉為
冰堅滑不可近契丹遂潰去獲其鎧仗甚衆以功拜莫
州刺史時真宗駐大名傳潛握重兵頓中山延昭與楊

嗣石普屢請益兵以戰潛不許及潛抵罪召延昭赴行
在屢訪邊要帝甚悅指示諸王曰延昭父業為前朝名
將延昭治兵護塞有父風深可嘉也厚賜遣還是冬契
丹南侵延昭伏銳兵於羊山西自北掩擊且戰且退及
伏發契丹衆大敗獲其將函首以獻進本州團練使與
保州楊嗣並命帝謂宰相曰嗣及延昭並出疎外以忠
勇自效朝中忌嫉者衆朕力為保庇以及於此五年契
丹侵保州延昭與嗣提兵援之未成列為契丹所襲軍

士多喪失命李繼宣王汀代還將治其罪帝曰嗣輩素以勇聞將收其後效即宥之六年契丹復侵望都繼宣坐逗遛削秩復用延昭為都巡檢使時講防秋之策詔嗣及延昭條上利害又徙寧邊軍部署景德元年詔益延昭兵滿萬人如契丹騎入寇則屯靜安軍之東令莫州部署石普屯馬村西以護屯田斷黑盧口萬年橋敵騎奔衝之路仍會諸路兵掎角追襲令魏能張凝田敏竒兵牽制之時王超為都部署聽不隸屬延昭上言契

丹頰澶淵去北境千里人馬俱乏雖衆易敗凡有剽掠
率在馬上願飭諸軍扼其要路衆可殲焉即幽易數州
可襲而取奏入不報乃率兵抵遼境破古城俘馘甚衆
及請和真宗選邊州守臣御筆錄以示宰相命延昭知
保州兼緣邊都巡檢使二年追叙守禦功進本州防禦
使俄徙高陽闕副都部署按東都事略云官至英州防禦使在屯所九
年延昭不達吏事軍中牒訴嘗遣小校周正治之頗為
正所罔因緣為姦帝知之斥正還營而戒延昭馬按東都事

畧云詐牒皆決於小校真宗知而不責也第戒飭小校而已語與宋史異 大中祥符七年卒

年五十七延昭智勇善戰沈默寡言平居未嘗問及家事所得奉賜悉犒軍奉已簡易號令嚴明與士卒同甘苦遇敵必身先行陣克捷推功於下故人樂為用在邊防二十餘年契丹憚之目為楊六郎及卒帝嗟悼之遣中使護櫬以歸河朔之人多望柩而泣錄其三子官其常從門客亦試藝甄叙之子文廣

文廣字仲容以討賊張海有功授殿直范仲淹宣撫陝

西與語奇之置麾下從狄青南征知德順軍為廣西鈐
轄知宜邕二州累遷左藏庫使帶御器械治平中議宿
衛將英宗曰文廣名將後且有功迺擢龍神衛四廂都
指揮使遷秦鳳副都總管韓琦使築築策城文廣聲言
城噴珠率衆急趣築策比暮至其所部分已定遲明敵
騎大至知不可犯而去文廣遣將襲之斬獲甚衆或問
其故文廣曰先人有奪人之氣此必爭之地彼若知而
據之則未可圖也知涇州鎮戎軍為定州路副都總管

遷步軍都虞候遼人爭代州地界文廣獻陣圖并取幽燕策未報而卒贈同州觀察使

王貴者并州太原人周廣順初補衛士太祖即位累遷至散員都指揮使馬步軍都軍頭領勝州刺史太平興國二年出為淄州刺史受詔從潘美北征攻沁州頗立戰功及從楊業為遼兵所圍親射殺數十人矢盡張空券又擊殺數人遂遇害年七十三擢其子文晟供奉官

文晟殿直

荆罕儒冀州信都人少為盜晉天福中詣范陽事趙延壽得掌親兵開運末延壽從契丹主入汴署罕儒密州刺史漢初改山南東道行軍司馬周廣順初為率府率奉朝請貧不能振顯德初世宗戰高平戮不用命者因求驍勇士通事舍人李延傑以罕儒聞即召赴行在命為招收都指揮使會征太原命罕儒率步卒三千先入敵境罕儒徑趨太原城焚其東門擢為控鶴弩手大劍直都指揮使從平淮南領光州刺史改泰州為下蔡守

禦都指揮使累擢至團練使太祖建隆初升鄭州防禦使改晉州兵馬鈐轄罕儒恃勇輕敵嘗率騎深入晉境人多閉壁不出虜獲甚衆復領千騎抵汾州城下焚其草市業兵以退一夕次京土原劉鈞遣大將郝貴超領萬餘衆襲罕儒黎明及之罕儒遣都監甄毳副使閻彥進分兵以禦貴超罕儒方錦袍裹甲據牀享士聞彥進小却即上馬徑犯賊鋒并人攢戈舂之罕儒猶手殺十數人遂遇害劉鈞素畏罕儒之勇欲生致之及聞其死

求殺罕儒者戮之太祖痛惜不已擢其子守勳為西京
武德副使因索京土原之不效命者黜慈州團練使王
繼勳為率府率閻彥進為殿直斬其部下龍捷指揮使
石進德等二十九人罕儒輕財好施禮接儒士恃勇善
戰不顧勝負常欲削平太原志未果而及於敗人皆惜
之罕儒兄延福延福孫嗣

嗣乾德初應募為控鶴卒從李繼勳討河東繼勳擇悍
勇百人間道截洛陽砦嗣請行手斬五十餘級進薄汾

河河東將楊業扼橋路嗣與衆轉戰殺業所部兵千計射中業從騎業退保城進焚南門奪羊馬城矢集於面敵夜薄砦繼勲選勇敢五百人接戰而嗣為冠及旦多所斬馘從太祖征太原率先陷陣召見補御龍直太平興國初三遷至天武軍校太宗再征太原嗣登城手刃數人足貫雙箭中手礮折二齒太宗賜以錦袍銀帶從崔翰征幽州補龍猛副指揮使五年契丹侵雄州據龍灣堤嗣隸袁繼忠遇敵屢擊之皆獲勝八年李繼遷寇

邊又從袁繼忠田欽祚戍三义口為前鋒斬賊千餘追
之獲牛羊鎧甲弓矢數千計進至萬井口狐路谷餘賊
復來請戰初以雄武千人為後殿為賊所掩繼忠命嗣
援之凡數戰始與雄武合隊因列陣格鬪復奪人馬七
百餘欽祚夜還依山為營賊亦砦其下募勁卒五十往
襲之嗣為其帥抵賊所刺殺百餘人焚其砦而還雍熙
三年從田重進譚廷美率師入遼境疾戰飛狐口遼師
不利重進引全師合擊遼騎引去進至飛狐城北遼將

大鵬翼率衆復至重進陣壓東偏數戰不勝命嗣出西
偏麾兵薄山崖以短兵接戰遼兵敗投崖而下手斬百
餘級散卒千餘在野嗣呵止之悉斷弦折箬來降追至
河槽復擊退餘衆屯土嶺裨將黃明與戰不勝將退嗣
謂之曰汝且屯兵於此為我聲援我當奪此嶺遂力戰
追奔五十餘里抵倉頭而還又領招收卒千人克倉頭
小治二砦黃明與戰克直谷砦命嗣屯馬數日遼人復
致師重進與戰奔突往來大軍頗擾重進召嗣合戰悉

走之奪礮具鎧冑賊乘夜復圍直谷石門二砦重進遣
嗣以精兵五百濟之嗣曰敵二萬餘今援師甚寡難以
解圍重進頗憂之嗣曰譚師屯小治縮兵二千願間道
以往邀其策應中夜匹馬詣廷美廷美曰敵勢若此何
可解也嗣曰請移全軍就平川植旗立隊別擇三二百
人張白旗於道側彼見旗幟綿亘遠甚謂大軍繼至嗣
自以所部五百疾驅往鬪必克其砦廷美許焉一日凡
五七戰遼兵遂引去咸如嗣所料蔚州之降也重進先

命嗣率勇士數十人縋入見守將得其實狀翌日將受降而敵反拒大軍所出之路遂與鬪殺傷甚衆屢縋入城取守將之歸服者重進之壘糧運頗乏嗣遣降卒輦州康濟之遼援兵大至副都指揮使江謙妄言惑衆嗣即斬之悉收兵斂輜重還重進砦與遼人轉戰時軍校五人其四悉鬪死至大嶺嗣與戰敗走之師還太宗引見便殿重進言其有勞補本軍都虞候又從李繼隆禦敵於北平砦將赴蒲城道遇敵疾戰俘獲甚衆又戰於

鸞女祠繼隆遣步卒二千伏定州古城為敵所攻命嗣
援之至唐河橋嗣扼橋路出戰解敵圍數重與伏兵合
分為三隊背水為陣敵將于越率騎百餘隊臨烽臺求
戰嗣整兵與戰數合得與繼隆會又陣於東偏大敗之
繼隆以聞詔嘉獎之遷本軍都指揮使領澄州刺史至
道二年加御前忠佐馬步軍頭屯定州遼人入侵隸范
廷召提偏師捍遼兵於嘉山廷召徙高陽命嗣以兵二
千為殿過平敵城遼衆十餘萬來嗣屢出戰及桑贊秦

翰來援夜二鼓敵再至嗣曰彼不利夜戰我當破其若
以趣大軍即與贊翰合勢戒所部望敵炬火多處并力
衝之詰旦至瀛州咸平三年加領本州團練使出為郎
山路都巡檢使破敵砦於蒲陰俘獲甚衆四年命嗣領
萬人斷西山路會敵遽至大兵不及進而止五年真拜
蔡州團練使趙州部署踰年徙滄州是冬遼人入侵命
率所部自齊州抵淄青警備景德初又命與劉漢凝田
思明率兵至冀州防邊俄赴澶州行在所會遼人請和

復遣還任歷鄆州鳳翔永興部署車駕幸亳州留為舊
城內同都巡檢使大中祥符七年改虢州防禦使邠州
環慶副都部署卒嗣起行間以勞居方面經百五十餘
戰歿兄子信貴並為左侍禁貴至內殿崇班

曹光實字顯忠

據東都
事畧增

雅州百丈人父疇為蜀靜南軍

使控扼邛味以捍蠻夷光實少武勇有膽氣輕財好施
不事細行意豁如也疇卒光實嗣職遷永平軍節度管
內捕盜遊奕使太祖乾德中命王全斌等平蜀俄而盜

賊羣起夷人張忠樂者嘗羣行攻劫且憾光實殺其徒
黨率衆數千中夜奄至環其居鼓譟並進光實負其母
揮戈突圍出賊衆辟易不敢近賊殺其族三百餘口又
發其父墓壞其棺擲光實詣全斌具以事白誓雪冤憤
時蜀中諸郡未下乃圖雅州地形要害兼陳用兵攻取
之策請官軍先下之全斌壯其志令率兵先導果克其
城獲忠樂而甘心焉全斌乃署光實為義軍都指揮使
殘寇猶據沈黎光實以所部盡平之遂以光實知黎雅

二州蕪都巡檢使安集勞來蠻族懷之六年全斌遣入貢京師遂言境內安乂乞罷義軍歸農太祖喜曰此蜀中傑俊也詔升殿勞問久之以為黎州刺史開寶三年改唐州刺史及平交廣羣盜未息以光實為嶺南諸州都巡檢使既至捕逐羣盜海隅以寧太平興國二年就遷本州團練使車駕征河東以光實知威勝軍事令調軍食光實入告願提一旅奮銳先登帝曰資糧事重亦足宣力也河東平命為汾遼石沁等州都巡檢使改汝

州團練使大軍北征與潘美分道出鴈門光實為前鋒
遇敵擊敗之李繼捧之入朝也以光實為銀夏綏麟府
豐宥州都巡檢使繼捧弟繼遷逃入蕃落為邊患光實
乘間掩襲至地斤澤俘斬甚衆破其族帳獲繼遷母妻
及牛羊萬計繼遷僅免使人給光實期某日降於葭蘆
川光實信之且欲專其功不與人謀及期繼遷先設伏
兵光實遂遇害卒年五十五以其子大理評事克讓為
右贊善大夫克恭為殿直淳化二年又錄克己為奉職

後至殿內承制克廣至閭門祇候從子克明

克明字堯卿既生會敵攻百丈縣父光遠遇害姆抱克明匿葦蒲中得免既長喜兵法善騎射從父光寶奇之補為衙內都虞候光寶擊敵於葭蘆川戰歿克明時護輜重在後聞光寶死懼軍亂秘不發喪令人傳光寶令還軍銀州而潛與僕張貴入敵中獲光寶尸還葬京師繇是顯名初蜀人留京師者禁不得還鄉里克明以母老間道歸李順反聞克明將家子且有名欲脅以官克

明攜母適山谷夜止神祠中夢有人叱之起既覺而去

賊果至及賊陷雅州克明募衆數萬人以迎王師遂復

名山大井夾門

東都事畧作夾江

等九縣分兵嘉眉邛三州立

七砦以邀賊復收雅州蜀平擢西頭供奉官黎州兵馬

監押以餘寇未息權邛州駐泊巡檢峽路潰卒鄧紹等

復起攻雅州克明又平之入朝改內殿崇班為温台等

七州都巡檢使景德中蠻寇邕州改供備庫副使知邕

州召左右江蠻洞三十六酋長諭以恩信是歲悉來赴

承天節克明慰拊出衣服遺之感泣而去獨如洪峒恃險不至克明諭兩江防遏使黃衆盈引兵攻之斬其首領陸木前梟於市宜州澄海軍校陳進反時鬱江暴漲州城摧圮克明伐木為連舫維之水上狀如郭郭又多張旗幟浮巨楫陳兵其上為守禦備募溪峒兵三千而黃衆盈亦濟兵千五百將趣象州會巡撫使曹利用約克明會兵行次貴州遇賊大敗之賊平利用專其功代還真宗問南方事對稱旨賜一子官遷供備庫使江淮

兩浙都太提舉捉賊使克明使人捕賊輒出私錢資之
以故人人盡力視賊中趨勇者釋縛使還捕其黨前後
獲千餘人知江寧府張詠以其事聞賜錢四十萬領平
州刺史知辰州撫水蠻叛徒宜融桂昭柳象邕欽廉白
十州都巡檢使兼安撫使既至蠻酋獻藥一器曰藥箭
中人以是解之可不死克明曰何以驗之曰請試以鷄
犬克明曰當試以人乃取藥箭刺酋股而飲以藥即死
羣蠻慙懼而去是年冬安撫都監王文慶馬玉出天河

砦東克明與中人楊守珍出環州樟嶺西磴道危絕林木深阻蠻多伏弩以待玉所向力戰屢敗蠻軍是時朝廷意在招附數詔諭克明而克明亦憚深入屢移文止玉玉至如門團為蠻所扼不得進克明遷延顧望月餘乃至撫水州與知州蒙承貴等約盟而還未幾知桂州兼管勾溪峒公事始置溪峒司又奏閱廣南兩路土軍為忠敢軍州人覆茅為屋歲多火克明教以陶瓦又激江水入城以防火災代還知滁州徙鼎州會交趾李公

蘊寇邕州以文思使復知邕州既至遣人入交趾諭以利害公蘊拜表謝罪遷西上閤門使歷知登舒邵三州復徙鼎州卒

張暉幽州大城人後唐清泰初隸控鶴軍累遷奉國弩手都頭晉開運末與武行德奪契丹甲船於河陰行德領河陽以暉為弩手指揮使復令引兵趣懷州契丹將遁去因領州軍漢祖入汴暉迎於滎陽授懷州刺史乾祐初郢州刺史慕容業治多不法以暉為緣漢都巡檢

使領唐州屯兵至郢州即代業還京改郢州刺史周廣
順初劉崇起兵晉絳召暉為步軍左廂排陣使師還改
沂州刺史從世宗征淮甸充壕砦都指揮使俄為西南
面橋道使太祖即位從征澤潞為行營壕砦使先登陷
陣事平遷華州團練使在郡頗有治狀建隆二年太原
未下詔入覲問計暉對曰澤潞瘡痍未復軍旅一興恐
人力重困不若戢兵育民俟富庶而後為謀朝廷方議
伐蜀遷鳳州團練使魚緣邊巡檢壕砦橋道使暉盡得

山川險易因密疏陳之太祖大悅乾德二年大軍西下
乃以暉充西川行營先鋒都指揮使督兵開大散關路
躬撫士卒且役且戰人忘其勞至青泥嶺卒天禧五年
暉妻年百五歲家貧詣闕自陳詔賜束帛錄其孫承德
為三班借職

司超大名元城人初事邢帥安叔千漢祖在太原超隸
帳下為小校漢祖將渡河遣超先領勁騎由晉絳趨河
陽及入汴以超為鄆州必敵指揮使時京東諸州寇盜

充斥以超為宋宿亳三州遊奕巡檢使改宿州西固鎮
守禦都指揮使移屯潁州下蔡鎮屢與淮人戰有功周
世宗命宰相李穀討淮南以超為步軍先鋒副都指揮
使又為廬壽光黃等州巡檢使大敗淮人三千餘衆於
盛唐縣獲擢船四十餘艘禽其監軍高弼果毅指揮使
許萬以獻時黃州未下即命超遙領黃州刺史兼樓櫓
戰櫂右廂都校師還改光州刺史敗吳軍千餘於麻城
北顯德四年與王審琦攻舒州敗吳軍三千先禽刺史

施仁望獻於行在即以超為舒州團練使太祖即位命副宋偓領舟師巡撫江徼詔升舒州為防禦以超充使從太祖討平重進以為前軍步軍都指揮使及平遣歸治所建隆三年遷蔡州防禦使乾德六年改絳州防禦使徙晉州兵馬鈐轄是秋又副趙贊為邠州行營都部署進攻河東及太祖親征為行營前軍步軍都指揮使改鄭州防禦使開寶七年朝廷將討江左以超久在淮右習知江山險易徙蘄州防禦使行至淮西卒年七

十一天禧元年錄其孫文睿為三班奉職



欽定續通志卷三百十三